

Lider di proyecto Formacion Social Jessy Ras satisfecho con e trayecto ta bayendo

“E hobennan aki kier haci nan famia orguyoso di nan”

ORANJESTAD- Lider di proyecto Formacion Social Jessy Ras ta satisfecho con cosnan ta bayendo. Diabierna siman pasa e di dos grupo consistiendo di 12 hoben a caba cu nan trayecto di un aña y a bin hunto na Fort Zoutman pa ricibi nan certificado. Un papel cu nan a traha duro pa haya. E ambiente den Fort Zoutman tabata di hubileo. E prome grupo a caba aña pasa na November. Sra. Ras a bisa e prome grupo por wordo compara cu un ‘baby’. “Nos a cuminsa cu algo completamente nobo. Mester a wak con e ta bay cana. E prome grupo tabata consisti di 20 hoben, loke ta menos cu e di dos y di tres grupo di 24 hoben”. Na januari a start cu e

di tres grupo. “Loke mi por bisa ta cu aunke cada grupo ta otro, un cos si nan tin en comun. Tur e hobennan aki ta dispuesto pa cambia nan bida”. Ras ta consciente cu ta un reto pa mantene e hobennan enfoca. Mester papia hopi cu nan y constantemente traha riba disciplina. E 4 lunanan den kazerne ta yuda, pero asina mes e disciplina ta keda un reto. Sigur pa loke ta e curso na Enseñansa pa Empleo y nan stage. Mester percura pa nan ta sigui atende e curso y presenta na ora pa core stage. “Esaki ta un parti dificil di e proyecto”. Sra. Ras a bisa cu nan ta bisa e hobennan cu nan mester wak mas leu cu e dia di awe so, pasobra ora nan caba, nan futuro ta

mas sigur. “Esaki ta un punto importante, tambe pa e famia. E hobennan aki kier haci nan famia orguyoso di nan”. Januari a cuminsa cu e di tres grupo cu ainda ta bezig cu nan prome 4 luna den kazerne. Na luna di mei nan ta cuminsa cu nan curso y core stage. Na augustus ta cuminsa cu e di 4 grupo. “Hobennan cu ta interesa pa start cu e trayecto Formacion Social por tuma contacto caba cu Bureau Sociale Vorming. Nan por inscribido di yama na 522 5352 y duna nan nomber”. Despues di inscripcion, e hobennan ta wordo invita pa un combersacion unda nan ta haya splicacion con e proyecto ta hinca den otro y kico ta spera di nan durante



Lider di proyecto Formacion Social Sra. Jessy Ras

henter e aña. Nan mester haci un sporttest, un Raven test cu ta un test di inteligencia pa determina nan nivel di educacion. Tambe nan ta sinta hunto cu Jessy Ras cu un psicologo. Ora cu tur e datonan ta conoci lider di proyecto ta sinta cu un comision di seleccion y a base di tur e informacion cu tin, e comision ta scoge 24 hoben pa cuminsa cu e trayecto. E otro nan ta keda como reserva. E trayecto ta consisti di un periodo di 4 luna den kazerne. E prome simannan nan mester keda drumi, despues nan mag di drumi na cas, pero mester acudi mainta tempran na kazerne. Ora nan caba e periodo di 4 luna, e hobennan ta cuminsa cu nan curso y stage cu ta dura 8 luna. E prome grupo a core stage na Valero y APA. E grupo aki a core stage na hotelnan, tambe na Johnson Enterprises pa

mecanico di auto y tres hoben a core stage na APA. Ras ta splica cu e prome dianan ta dificil pa e hobennan. Nan mester custumbra di lanta tempran, traha den grupo y sigui ordo di otro nan. E hobennan cu tin problema cu esaki hopi bes ta cay afo. Ora cu scol cuminsa ta un otro momento dificil pa algun di nan. “Nan mester sinta den klas y custumbra un biaha mas cu e rutina di scol. Pa loke ta stage ta importante pa nan yega na ora”. Entre e hobennan cu ta cay afo tin algun cu kier bin bek. “Mi tin un hoben di e prome grupo cu a cay afo y a dicide pa bin bek y awor ta parti di e tres grupo. E ta bayendo super bon. Tin mas hoben cu a yama mi cu nan kier cuminsa di nobo. Nan ta realisa cu e proyecto aki ta bon pa nan mes. Nos ta tuma nan den e inscripcionnan, pero ta e comision ta dicide”. □



Grupo di Formacion Social den entrenamiento.